



## TALOFA LAVA!

I le suafa paia o lo tatou Alii o Iesu Keriso, ou te faatalofa atu ai i le mamalu uma o le au faitau o lenei lomiga o le Maluapapa. Malo le lagi e mama ma le soifua manuia. Ou te faatalofa atu foi i le paia ma le mamalu o le Ekalesia ua tauaofia i Malua mo lana Fono Tele i lenei tausaga 2011. Lau afioga i le Taitaifono ma le Sui Taitaifono faapea le Laulau a le Fono Tele. Lau afioga i le Taitaifono ma le Failautusi ma le paia o le Komiti a le Au Toeaina, le paia i le nofo a Komiti uma a le Ekalesia, faapea le paia i Sui Usufono o le Fono Tele o lenei tausaga, tainane le loaloa o le Ekalesia i ona tulaga faalupe. Ia saga faateleina pea le viiga ma le faafetai i le Atua, ona o lana pule faasoifua ma lona agalelei tele ua tatou aulia mai ai lenei vaitau taua o le tausaga, i le tauaofia ai o le Fono Tele a le Ekalesia. Tau ia ina ia saga faatumuina pea e le Atua lana Ekalesia i lona lava Agaga, e ta'ita'i ma faamanaina ai le faatofala'iga a lenei Fono Tele aua le lumana'i manuia o le galuega a le Atua o loo feagai ma lana Ekalesia i Samoa ma le lalolagi atoa.

E avea lenei avanoa e momoli atu ai le faamalo ma le faafetai tele i le Aoao o le Ekalesia ona o la outou tatalo faifaiepa mo le Kolisi i Malua nei, faapea foi lo outou lagolagoina o le Kolisi i le tele o itu, ua manuia ma sologa lelei ai ana polokalame ma galuega fai o lona tausaga seia oo



**Susuga Dr Afereti Uili FS**  
**Pule o le Kolisi**

mai i lenei taimi. E fia faamauina foi le faafetai faapitoa i le Komiti o Malua ma le Komiti o le Au Toeaina, o Tama lava o le Kolisi Faafaifeau i Malua. Malo le faapalepale ma le alofa faa-tama i le Kolisi, ae maise o lau tatalo aua le manuia o le alo faiva o le Kolisi i ona tiute e pei ona faatunuina ai e le Ekalesia. Malo foi faafetai i le taitaiga o lenei Kolisi i auala uma e manuia ai lona aga'i i luma.

Avea foi lenei avanoa e momoli atu ai le faamalo ma le faafetai tele a le Kolisi Faafaifeau i Malua, i le susuga i le Toeaina Faatonu ia

loritana Laau Tanielu o le sa fai ma Taitaifono o le Komiti o Malua ma le Komiti a le Au Toeaina. Malo le taua-ta'i ma le faatoatoa. O lea ua a'e manuia faiva sa feagai ai i le Ekalesia. Faafetai tele i le tofa faale-Atua na e faasoa mai mo le Kolisi, aemaise o le alofa faamaoni sa fai ma ta'iala taua mo i matou, i lo matou foi ola auauna i le Atua. Tau ina ia faamanuia tele le Atua i Lau Susuga ma le Faletua ia Lonise, i nisi o laasaga fou o le soifuaga o le a aga'i atu iai.

E le itiiti foi le agaga o le faafetai i Susuga i Toeaina Faatonu ia Eteuati Pasia ma Apelu Amosa, o nisi o Tama o le Kolisi sa galulue i le Komiti o Malua ma le Komiti o le Au Toeaina. Malo fai o le faiva. Faafetai tele i le agalelei ma le alofa faa-tama i le Kolisi, faapea le fesoasoani ma le lagolagoina o le Kolisi i nei tausaga uma sa fitaituga ai i le Komiti a Tama o le Ekalesia. Faamanuia tele le Atua i a oulua Susuga i Toeaina ma oulua Faletua, i soo se lavasiga ma soo se tiute o le a feagai ai i le lumana'i.

Ia manuteleina le Fono Tele a le Ekalesia i lenei tausaga.

"Le Alii e, ia e faatumuina lau Ekalesia i lou Agaga."

Soifua,  
Afereti Uili FS  
Pule o le Kolisi

### SILASILA I TOTONU

|                                                 |       |                                                   |    |
|-------------------------------------------------|-------|---------------------------------------------------|----|
| Talofa Lava! - Susuga Dr Afereti Uili           | 1     | Polokalame Meataulima Faletua Malua               | 10 |
| Tautai A'e                                      | 2     | Aoga Faataitai a Malua                            | 11 |
| Aoga Tusi Paia Malua                            | 3     | Autalavou Laiti / Vaega o le Pa Povi              | 12 |
| E Manatua Pea: Tubusereia Tiatia                | 4-5   | Malua Literacy Program / Aoga Faitau Tusi Samoa   | 13 |
| Amatalia Galuega i le Kolisi                    | 5     | Aoga Aso Sa / TALA i Taaloga - Taaloga a Faletua  | 14 |
| Maota Fou i le Laumua / Rethinking Hermeneutics | 6 - 7 | TALA i Taaloga - Taaloga a Aoao / Kalena mo Malua | 15 |
| IA MOTU LE PA A UA ILOA                         | 8 - 9 | TALA i Taaloga - Tagapolo Faa-va-o-malo           | 16 |

# TAUTAI A'E



**Loritana Laau Tanielu FT ma Lonise**



**Eteuati Pasia FT ma Sapini**



**Apelu Amosa FT ma Kapineta**

O le aso Lulu, 18 o Me 2011, sa faia ai se sauniga lotu fa'apitoa mo susuga i toeaiina ua ausia tausaga penisione o le galuega faafaifeau. Na amata lenei sauniga i le itula e 10.00 i le taeao ae na mae'a i le itula e 12.00, ma na matua faatumulia le Fale lupeli i Malua i e na auai atu ai i lea sauniga. E le masani ai i tausaga uma o fonotele ona faia lenei sauniga vagana ai ua i ai nisi o le au faigaluega ua aulia tausaga penisione.

O le sauniga sa taitai e le susuga ia Tavita Roma, faatasi ai ma nisi o toeaiina sa fesoasoani i ai i le sauniga lotu. O le agaga ma le autu o le sauniga o le momoli lea o le faafetai i le Atua ona o le soifua auaina o nei Tamā o le Ekalesia i tausaga e tele. Faatasi ai ma le faafetai tele i susuga i toeaiina ona o lo latou soifua galulue i ekalesia sa galulue mo le tele o tausaga. Aemaise fo'i le tele o nisi galuega ma faatinoga lelei sa faia i ekalesia ma nuu e pei ona sa osi feagaiga ai le au faigaluega. O le leo fo'i o le faamalo ma le agaga fiafia na momoli atu e le ta'ita'i o le sauniga i le au toeaina penisione ona e ui i faigata eseese o le galuega a o lea ua tini taunu'u lava i lona fa'ai'uga. O suafa la nei o susuga i toeaina ma o latou faletua ua penisione,

Loritana Laau Tanielu FT & Lonise (Aukilani)  
Eteuati Pasia FT & Sapini (Faleata)  
Apelu Amosa FT & Kapineta (Vitoria)

E ui ona ua malolo ma mapu mai i latou nei mai i le galuega a o talosaga molia fo'i e pei ona sa tuuina atu e le ta'ita'i o le sauniga, ia faafualoaina pea e le Atua soifua o le au faigaluega penisione. O se sauniga mamalu tele toe faatumulia i le toatele o i latou sa molimauina e le gata o le tapua'iga, a o le agaga fo'i o le fa'agae'etia ma le fa'aeaina o susuga i toe'ina penisione ma o latou faletua. O le faamanuia a le susuga i le ta'ita'i o le sauniga i le au toeaina penisione, o le fa'amanuia fa'atasi lava lea a e na auai ai i le sauniga faatasi ai ma le ekalesia aoao EFKS.

O upu a le Aposetolo o Paulo, "Ua ou tau le taua lelei, ua i'u ia te a'u le tausinioga...". Faamalo faafetai le galulue punoua'i ma le onosa'i i le galuega a le Atua i tausaga e tele. Ia faamanuia pea le Atua ma puipui i lo outou soifua.

# AOGA TUSI PAIA MALUA



**Susuga i Toeaina: Tautiaga Senara, Kerisiano Soti, Ioritana Tanielu; Alii Pule - Afereti Uili**



**Solo o le Au Faaau 2011**

I lona aotelega, o loo tala manuia le gasologa o le Aoga Tusi Paia i le lona fa'a'i lenei o tausaga talu ona amataina (2007-2011). E toluasefulu iva i latou o loo lesitala i mataupu e sefulutasi mo lenei vaituuaga. Mai lea aofaiga, e to'afa nisi o tamalii mai fafo atu o le Kolisi, e mafuli lava i a'oa'o fesoasoani, o loo ave a latou mataupu, ae ua le aofia ai nisi ua toe faamaamulu ona o tuano'a i galuega. O le toatele lava la o le au aoga o faletua o faiaoga Malua ma faletua o a'oa'o o le Kolisi, o loo latou faatāuina lenei avanoa e faateleina ai lo latou silafia i mataupu eseese tau i le Tusi Paia, mataupu silisili, tala faasolopito ma le galuega faafaifeau. E toa sefulutasi faiaoga o feagai ma le aoina o mataupu i lenei vaituuaga. I le polokalame faagasolo o i ai nei, o le aso 6-10 o luni le vaiaso faitau tusi, e tapena ai mo suega i le vaiaso e sosoo ai, 13-17 o luni. O le lesitala mo le vaituuaga lona lua e faataunu'u i le aso 11-15 o Iulai, ona amata lea o vasega i le aso sefulu valu o le masina lava lea.

O le aso 19 o Mati 2011 na faataunu'uina ai le Faauga lona tolu a le Aoga Tusi Paia. Sa taitaia le sauniga e le Taitaifono o le Komiti a le Au-Toeaina, o le Taitaifono foi o le Komiti Faafoe o Malua o loo nafa ma le vaaia o le Aoga Tusi Paia, Ioritana Tanielu FT; o le Tusi Paia sa fofogaina e le Failautusi o le Komiti a le Au-Toeaina, Tautiaga Senara FT; tatalo sa saunia e le toeaina Faatonu o le Matagaluega a Malua, Apelu Lelevaga FT; o le lauga sa fofogaina e le Toeaina Faatonu o le

Matagaluega a Apia, Kerisiano Soti FT. O le lauina o le au faauu sa feagai ma le Sui Pule o le Kolisi, Maafala Limā FS, a'o le tuuina atu o Tusi Pasi sa faatau-taia e le Pule o le Kolisi Dr. Afereti Uili FS, ma le tauaoina aloaia atu o tusi pasi, o le Taitai o le sauniga, Ioritana Tanielu, sa feagai ma lea tiute taualoa.

E toluasefulu fa'i latou na faamanuaina i le Tusi Pasi o le *Certificate in Theological Studies* ae toaiva na tuuina atu i ai le Tusi Pasi o le *Diploma in Theological Studies*. Sa faaiiina lea aso fiafia i le Fale Senetanari i se taumafataga māmā ma nai siva a le au faauu. Sa saunoa le afoaga a Aumao Akeripa AF e fai ma sui o le au-faaau e faafetaia le Taitai o le sauniga ma le au mau tofi ona o le faafoega o le sauniga, faafetaia foi le Pule o le Kolisi ma le aufaigaluega i la latou foi pito laau, ma le faafetai i aiga, uō ma e masani i le lagolagosua i lo latou taumafai. Sa faailoa foi le agaga faafetai o le au-faaau i meaalofo sa i totonu o teutusi mo le mamalu sa aofia i lea aso. Na faaii lea aso i le tauluga na sausaunoa ai le Faletua o le Taitai o le sauniga, Dr. Lonise Tanielu, ma nisi o faletua o Toeaiina ma Faafegaiga sa auai ona faaii ai lea i le tatolo na saunia e le Taitaifono o le Ekalesia, Tavita Roma FT - ona lulū aao ai lea ma faatofā.

O le tulaga ua matauina, ua faasolosolo lava ina faaitiiti i latou mai tua e maua avanoa e aoga ai i le Aoga Tusi Paia. Peitai, o loo i ai lava i latou o loo tausili pea e faauma a latou polokalame ua amatalia. E toatele foi nisi

sa faailoa mai le fia auai ae ona o nisi o fatiatamai e pei o le taumamao o Malua ma Apia o loo feagai ai ma galuega, faatasi ai ma taimi o loo faatula-gaina mo vasega, ua faafaigata ai ona auai mai. I le taimi nei o loo faagasolo le toe lauiliuina o le polokalame a le Aoga Tusi Paia ma le faamoemoe e maua ai se fofō mo faafitauli pei ona taua. Ae o loo taumafai malosi pea le Pule o le Kolisi ma le aufaigaluega e fetuunai le polokalame i le taimi nei ina ia maua lava le avanoa mo e tausavali, tainane foi le avanoa mo faletua o faiaoga ma a'oa'o o le Kolisi e aunoa ma le faalavelaveina o le gasologa lelei o polokalame faatulagaina a le Kolisi Faafaifeau mo faletua o a'oa'o. E i ai lava le faamoemoe maua o le a faatoateleina nisi mai tua e mafai ona ave mataupu i le vaituuaga o loma nei. Ia manuia le faaiiuga o le Fono Tele o lenei tausaga.

(A. Eteuati: Sooupu mo le Aoga Tusi Paia)

## FAASILASILAGA

E faamanatu atu i le Ekalesia mo i latou o ē fia aoga i le Aoga Tusi Paia i Malua, o le ā faia le  
Resitara mo le  
**Vaituuaga lona lua**

**Aso 11-15 Iulai 2011**

**Faafesootai mai le Ofisa i Malua  
Telefoni 42 303**

## E MANATUA PEA:

## Tubusereia Kadeboro 'King' Isaia Tiatia: O le A'oa'o Malua

Fanau: 30 Iulai 1977 Taurama, Port Moresby PNG

Maliu: 28 Mati 2011, Motootua

O le toe sefulutasi minute soliatia le la i le Aso Gafua 28 o Mati 2011, na lagona ai le alaga o le tagifano i le potu e taofia ai gasegase tigaina i le Acute 8 o le maota gasegase i Ulumotootua, ina ua nofo le manava a le a'oa'o o Tubusereia - ua uma lona ola ina ua 33 tausaga 7 masina ma le 28 aso o lona soifua talavou. O se ituaso faanoanoa ia Afereti ma Samata ma nisi o faiaoga ma faletua o le Kolisi sa molimauina toe taimi o Tubusereia i le falemai; aemaise fāsaga o tiga ona o mafutaga ua motu e le oti mo si faletua o Maria, susuga i le Toeaina Faatonu ia Isaia ma le faletua ia Vaipuese Tiatia, o tuafafine o Tubusereia ma o la aiga sa i ai. Ua manino ai foi i lea ituaso, ua faai'u i lagī le soifua a'otau o Tubusereia Kadeboro Isaia Tiatia, o se tasi o maaveave matua o le suiga Tausaga Lua o le 2011 i totonu o Malua.

Na mulimuliane feofofoai i faamafanafanaga ma faalaeiauga ina ua mautinoa, e tupoupou pea le pule a le Atua e le gata i le ola nei, a'o ona talaatu. Na saunoa le Pule o le Kolisi e momoli faamaisega i le Toeaina ma le faletua, o Maria ma le fanau ma aiga sa faatasi ai i lea ituaso ma faaiu ai i le tatalo. Sa tali fuaitau le Toeaina o Tiatia ma ia taua ai: o le faamafanafanaga sili lava pei ona saunoa le Pule o le Kolisi, o lo tatou mautinoa o loo soifua le Alii. O le afioga i le Sui-Taitaifono, Sususga a Lale Ieremia FT na taitaia le sauniga puupuu i le maota tatalo o le falemai a'o lei tuuina atu le a'oa'o i le maota maliu o Letoa Sefo Pa'u e talitali ai taimi o ona toe sauniga

O nai minute talu ona maliu Tubusereia na lologo ai ma le faateia tele i le tala faanoanoa le tapuai tatalo mai o le Kolisi. Na faalologo ma le faanoanoa ona e lei mafaufauina o le oti le taunuuga o le sailiga togafiti a Tubusereia i le falemai. Aemaise ai, sa auai le a'oa'o i taaloga, o vasega, ma polokalame masani a le kolisi a'o lumanai ai le oo atu i le falemai i le aoauli o le Aso Faraile 26 o Mati. Sa mamao lava i manatu o le Kolisi atoa e tugā se gasegase o aafia ai le uso, ae ai lava o lona talitiga i ona mafati-



aga na faaleiloga ai lona gasegase. E sala foi ina mafatia le Kolisi ona sa le tuuaunoa le auai atu o le Pule, Sui-Pule, faiaoga, a'oa'o ma faletua e tuuina atu fesoasoani na moomia mo ona togafitiga, i le faamoemoe lau-luga e toe faafoisia lona malosī. Ae ogaoga foi le faanoanoa o le toatele o a'oa'o sa ofoina o latou toto mo togafitiga o Tubu, ma le manatu o le a manuia ai le gasegase o le uso. Ae ua taunuu ai se tasi o muagagana a le atunuu: Ua le ō gatasi le futia ma le umele; ina ua naunautai le futia e faatino le faiva, ae pagā lea ua musuā le umele e toso a'e i'a o le faamalieloto.

O se vaitau ese lea i totonu o le Kolisi ma e lē faigofie foi ona autala. E lolotu ma loimata, feofofoai ma fefaamafanafanaa'i i le fetagisi, ma ua aifilofilo le faanoanoa i talanoaga, e faagasolo foi vasega ma le iloa ua ufita'i e faanoanoaga le Maluapapa atoa. A'o se vaitau ua iloa mautinoa ai le loloto ma le mafana o le mafutaga i totonu o Malua, e le gata i le Pule, Sui Pule ma faiaoga, a'o le nofo-a-suega. E talia gatā le maliu o se totino o le Kolisi.

O le numia ai o le Kolisi i le agaga faavauvau, e mafua ona ua toesea se tasi o a'oa'o tusaafia, faaaloalo, faamaoni, tau faaata, galue fiafia, ae tau faasee foi o le Kolisi. A ua le atoa

ai foi ti'a o le tautiaga; a'o le faamoemoe o le Pule ma le Kolisi, aiga, ekalesia, ma afioaga o nofo tatalo ina ia faaiuina ma le manuia le nofo a'oa'oina o ā latou tama fanau i le Maluapapa mo le Talalelei, ae talofa! ua le tau lau o le faamoemoe. Peitai, e faamafanafanaina le tapuaiga pe a manatua, ua mapu atu le lupe na faalele o Tubusereia i le Aai Paia, le Maota i le lagi.

O le Aso Lulu i le itula e fitu i le afiafi na failotu ai le aiga-faiaoga ma faletua, o a'oa'o ma faletua o le Tausaga lua, ia Tubusereia ma le faletua ia Maria ma o la alo, le Toeaina ia Isaia Tiatia FT ma le faletua, ma nisi o aiga sa mafai ona auai atu i lea afiafi. Sa taitaia le faigalotu e le Pule o le Kolisi. O le Aso Faraile na failotu ai le Kolisi atoa ma sa taitaia le sauniga e le Sui Pule o le Kolisi, Maafala Limā FS. Sa faataunuua lea faigalotu i le maota o Tamaitai ma Alii Tausi Soifua i Motootua. O le Aso Toonai na oo atu ai le Kolisi e momoli le fesoasoani i le Toeaina ma le faletua, o Maria ma le fanau ma aiga, mo le peau taumvae o le a'oa'o. A'o le gagaifo o le la i le Aso Sa na auai atu ai le Kolisi i le sauniga faa-le-aiga o Tubu i le maota o Sefo Pa'u lea sa taitaia e le susuga ia Enele Tiatia FS. E matafelefele molimau o le soifuaga o le a'oa'o mai taimi o lona *taulealea*, o se tama faigata a'o i le vaitau tafao o lona olaga, o se alii fai uō, e uiga malie ma tusaafia ae aillililo; e fiafia i musika ma taaloga; e ola filigā, e faamaoni lona alofa ia Maria ma le fanau, ma o se a'oa'o e fiafia e osi ona aiga. Mai le vao o ia molimau ua faamausaliina ai le mau a le Pule ma faiaoga o le Kolisi, o Tubusereia ua lava tapena mo le avefa ma a'oa'o i le Kolisi i Malua.

O sauniga faaiu o Tubusereia sa faataunuua i le itula e sefulu i le taeao o le Aso Gafua 4 o Aperila i le Fale lupelī. Toatele le mamalu o le EFKS, nisi o ekalesia eseese, le malo, uo ma e masani, o aiga na lua na faatumulia ai le lupeli. Sa ta'ita'ia le sauniga e le Afioga i le Taitaifono o le

fa'aauau itulau 5

mai le itulau 4

Ekalesia, Susuga ia Tavita Roma FT. Sa molimoli mai i totonu o le lupeli le sa o le a'oa'o e Alesana Eteuati FS, o le faiaoga o le auaga o Tubusereia ma Maria ma le fanau; o le faitauina o le Tusi Paia sa fofogaina e Dr. Peni Leota FS, faiaoga Malua. O molimau sa saunia e le Susuga i le Toeaina Faatonu o Isaia Tiatia, Maria Tubusereia Tiatia, sosoo ai ma le molimau a le Pule o le Kolisi, Dr. Afereti Uili FS; ona faaiu lea i le molimau a le afioga i le Tiakono Toeaina o Seuala Patone, fai ma sui o le aulotu a Lalomanu. O talosaga sa fofogaina e le Toeaina o le Pulega a le Itu Asau, Amuia Seuala FT, o se tasi o lupe faalele a le afioga o Lalomanu. O le lauga sa feagai ma le Pule o le Kolisi, Afereti Uili. O pese o le sauniga sa fofogaina e le Kolisi Faafaifeau i Malua. Na faaiu le sauniga i Malua ona molimoli atu ai lea o Tubusereia mo lona toe sauniga i lona oliolisaga tumau i Vaitele Uta ma sa taitaia e le Taitaifono o le Ekalesia, Tavita Roma FT. Na faaiu lea aso i se taumafataga felanulanua'i ma faaaloaloga faatupu a le Toeaina ma le faletua, le faletua o Maria, le ekalesia i Lalomanu, ma aiga na lua, i le aofia sa auai i toe sauniga o le a'oa'o. Ae mo le Kolisi lava ia, na inu malie ma tofu malemo i le tele naua o faaaloaloga, o pelega o le a'oa'o Malua o Tubusereia Kadeboro Isaia Tiatia. *Amuia lea auaua, e maua mai e lona matai o loo faapea ona fai: E manatua pea.* (Komiti o le Maluapapa)



Maria ma Tubusereia



Tubusereia, Semi, Sili



Pati, Tubusereia, Tanoa,

Leiofi, Risati, Fililagi, Alesana, Tubusereia, Tanoa



## AMATALIA GALUEGA A LE KOLISI, 2011

O le aso 9 o Fepuari 2011 i le itula e 12.00 i le auauni na toe a'e ai le Kolisi Faafaifeau i Malua ina ua mae'a vaiaso e sefulu sa tuua ai mo le Kerisimasi ma le Tausaga Fou. Sa va'aia fo'i le toe tumutumu ma le nofoia o totonu o le laumua ina ua toe tapena mai a'oa'o ma o latou aiga ina ua toe a'e mai le Kolisi aua fo'i le toe amatalia o a'oga o lenei tausaga. O le va'aiga fou e masani ai i lea taimi o le tausaga o le fa'aulufaleina mai lea o a'oa'o fou ma o latou faletua, aemaise fo'i faia'oga fou ma o latou faletua. I lenei la tausaga e to'a 25 a'oa'o fou o le tausaga muamua sa ulufale mai i le Kolisi, ma sa fa'amanuiaina uma fo'i a latou ta'utinoga i luma o le au toea'ina. Sa amata aloa'ia ai fo'i i lenei tausaga le auauaga a le pule tofia o le Kolisi, Dr. Afereti Uili ma le faletua o Samata, e sui tulaga i le susuga i le Polofesa Otele ma Julie ua malolo mai i lea

tofiga. O lenei foi tausaga e tasi le faiaoga fou ua fa'aopoopo mai e galue mo le Kolisi, o le susuga lea ia Olive ma lona faletua o Maria. Sa a'oa'o'ina i le Kolisi Faafaifeau i Fiti i le tausaga 2009-2010, ma fa'amanuiaina ai le taumafai ma tofia ai e le Komiti o Malua e galue fa'afaiaoga i le Kolisi.

O lea fo'i la sa faia ai le sauniga lotu masani a le Kolisi e pei ona i ai i tausaga ta'itasi e amataina ai ana galuega masani o lenei tausaga. Na amata le sauniga i le itula e 7.00 pm ma na faatumulia lava i le Kolisi faapea fo'i nisi o le au faigaluega ma aiga o a'oa'o. Sa ta'ita'i e le Taitaifono o le Komiti o Malua loritana Tanielu FT, ae lauga le susuga ia Toese Peleti FT i lenei sauniga e tima'i ma fa'amalosi ai i le Kolisi ma ana galuega fa'agasolo o lenei tausaga. O le taua fo'i o lenei sauniga ina ia faaulufale aloa'ia mai ai a'oa'o fou ma o latou faletua i totonu o

le Kolisi ma ana polokalame. O le upu lava a le Atua sa fai ma ta'imua ma fa'alototele i le su'ega muamua aua o le mea moni lava e le faigofie le soifua a'otauina i totonu o le Kolisi. O le taua fo'i o lenei sauniga ona sa aloa'ia ai le amataina o le tofiga o le pule o le Kolisi, susuga Afereti faapea fo'i le susuga i le faia'oga fou ia Olive mo le tausaga e 2011. Sa lagona lava le loto tetele i le faatasi mai o le agaga o le Atua mo le faatinoga o galuega o lenei tausaga ina ua faatomua i le faatasisia o le taitaiga mana a le Atua, pei ona autu i ai lenei sauniga.

Sa fa'ai'uina lea po i se taumafataga na tapenaina e le Kolisi mo susuga i toea'iina, faiaoga, aemaise aiga o uo ma e masani. Sa vaaia lava le fiafia ma le faagaetia i lea po ina ua toe fuifui fa'atasi le fanau a le Atua ona o le toe fa'aauauina o galuega o lenei tausaga 2011.

# MAOTA FOU I LE LAUMUA

## 1. PULEGA A AANA ALOFI



## 2. PULEGA A MAUGAKIEKIE



## 3. PULEGA A ANOAMAA



## 4. FALE MO GALUEGA FAI A FALETUA



## RETHINKING THE JOURNEY AND COURSE OF HERMENEUTICS IN OCEANIA : NAMOLI VILLAGE, LAUTOKA FIJI 13-19<sup>TH</sup> MARCH 2011



This consultation was organized by the PCC (Pacific Council of Churches), GPP (God's Pacific People), and SPATS (South Pacific Assoc. of Theological Schools), who invited 82 participants representing 24 member churches in the Oceania region, to discuss over the above topic.

### Background

The PCC General Assembly 2007 made reference (Resolution 48) to the concept of *Turanga Waewae* as one of the key concepts to promoting common values in Oceania and in the security of identity. The resolution pointed to the need "to do hermeneutics both in defining for ourselves the meaning of such concepts and claiming ownership over it and to discern how such ideas can help to shape, enrich and engender confidence in who we are as people of Oceania." Subsequent regional meets raised the same concern of a "need for a proper hermeneutics which implies rethinking our present understandings of hermeneutics and its methodologies, and proposing a hermeneutical framework that will speak intelligibly to our people, assisting us with our faith and relationship with God."

### Objectives

1. To produce a hermeneutical framework for Oceania for the 50<sup>th</sup> anniversary celebrations in August/Sept 2011 and which will become the basis for group work towards the PCC General Assembly in 2012 and beyond.
2. To provide theologians, biblical scholars and those in pastoral ministry in Oceania, a creative space for discussions and deliberations on a hermeneutical framework for member churches and theological schools.
3. To identify key hermeneutical principles and methodologies that are essentially of Oceania and which will assist the churches in their discernment and actions on regional key issues that are of great concern to them.

### Papers

1. "Hermeneutics is Body, Mind and Soul, Dancing the haka" – Rev. Dr. Tevita Mohenoa Puloka
2. "A brief history of theological hermeneutics in the Christian Church" – Dr. Kafoa Solomone

3. "When enough is enough – Towards an Oceania of sufficiency and solidarity, inclusiveness and participation" – Fei Tevi

4. "Ecumenism and its Hermeneutical Experience in Oceania" – Rev. Dr. Fele Nokise.

5. "Hermeneutics of Ecology and its relationship to the identity of the oikos in Oceania" – Rev. Dr. Cliff Bird.

6. "The challenge and contribution of gender to theological hermeneutics in Oceania" – Rev. Dr. Asinate F. Samate

7. "The challenge and contribution of postcolonial theory to the theological hermeneutics in Oceania." – Rev. Dr. Mosese Mailo

8. "Kautaha in island hermeneutics, governance and leadership" – Rev. Dr. Jione Havea.

9. "Hermeneutics of peace, Papua New Guinea – A Melanesian perspective" – Fr. Robert Nolie

10. Assorted bible studies on the same topic.

The week-long discussions and exchanges over the above papers and devotional bible studies resulted to the formulation of the document "Namoli Framework", which would be presented to the PCC celebration this August/ September (Malua, Samoa), as the product from this Namoli consultation. In the document itself, there's firstly an acknowledgement of the hospitality of the Namoli people. Part 2 contains the "affirmations" on what the conference felt was 'hermeneutics'. Third and finally what the conference felt was the framework of hermeneutics proper for Oceania.

### Way Forward

The key to having a successful sense of hermeneutics for the Oceania, is to engage as much as we can in hermeneutics in the Oceanian way. The more we experience and experiment, the more we learn.

### Acknowledgement

Im grateful and thankful for the opportunity given to be part of this important consultation especially to be part of a regional discussion with other people who are although part of us, yet very different from us. Engagement at times seemed difficult due to the diverse nature of the forum, but its productivity was unquestioned for all participants.

Insights acquired from this consultation will be transmitted and relayed to our students as part of their theological education and journey.

Faafetai,  
Rev Siu Vaifale  
Malua

# IA MOTU LE PA A UA ILOA...

## FAIAOGA MO LE GALUEGA TAUSINUU

O le susuga i le faiaoga ia Semo Tapaleao, le faletua o Theresa ma lo la alo o Tofuola o le a sauni e tuua le kolisi ina ua la talia le valaau e tausia le aulotu a le Ekalesia Faapotopotoga Kerisano i Amerika Samoa i Aoloau. O le susuga ia Semo ma le aiga na i'u mai le kolisi i le 2004, sa fa'auau le aoga i se sikolasipi mai le Ekalesia i Kampen, Netherlands ma faamanuiaina ai i le Masters of Theology. Na toe taliu mai ma tofia ai e le Komiti o Malua e galue i le kolisi i le tofi faiaoga i le masina o Aokuso, 2006. Ma na faau'uina i laua i le tofi o le Faifeau Samoa i le fonotele o Me 2009. O Tapaleao sa galue i matagaluega o le Feagaiga Fou ma le Mataupu Silisili.

O le susuga ia Faatafa Nefu ma le faletua o Sinuanua ma lo la alo o Sipona o le a sauni mo le galuega tausinu i le EFKS i Alamagoto. O Faatafa ma le aiga na i'u le taumafai mai Malua i 2003. Na toe taliu mai le la aiga, ina ua tofia e le Ekalesia e fai ma kamuta e fesoasoani i le atina'eina ma le faalelei'ina o fale i totonu o Malua. Na faau'uina i laua i le tofi Faifeau Samoa i le Fono Tele 2009.

## O LE FAIAOGA FOU O LE KOLISI - OLIVE SAMUELU



Olive ma Maria Samuelu o le faiaoga fou o le kolisi. Sa faai'uina lo la taumafai i Malua i le 2008, ma faaauauina le aoga i le Pacific Theological College i Fiti. Ua toe taliu mai i le kolisi ma lo la alo o Erenei ina ua faamanuiaina i le faailoga o le Masters in Theology (Distinction). Ua faiaoga nei Olive i le vaega o loo aoaoina le Mataupu Silisili.

## SAUNIGA: FAAUUGA O FAIFEAU 2011



**Alesana & Lemau Pala'amo**  
Faiaoga Kolisi Faafaifeau i Malua

E toa sefulu tolu (13) i latou na faamanuiaina i lenei tausaga e avea ma Faifeau Samoa: Alesana & Lemau Palaamo (Faiaoga Malua); Aigofie & Ella Marino (Faiaoga Malua); Ali & Fogalele Alapati (sa Faiaoga i Nuuausala); Esekia & Asofiafia Peneueta (Tausi nuu: Lepea); Ietitaia & Osana Solipo (Ofisa Aoaoga Kerisiano); Ioane & Amia Tauiliili (Faiaoga Tuasivi); Faraimo & Saroni Tiitii (Tausi nuu: Utalii); Peniamina & Sose Filivaa (Tausi nuu: Seattle, USA); Perenise & Faalua Malota (Ofisa Aoaoga Kerisiano); Pu'a & Maleina Tima (Tausi nuu: Green Valley, SYDNEY); Savelio & Mati Ah Colt (Faletusi-la Malamalama); Suva & Mere Huch (Pule: Faletusi-la Malamalama); Tavita & Mafaufauga Pulu (Tausi nuu: Togo).



**Aigofie & Ella Marino**  
Faiaoga Kolisi Faafaifeau i Malua

O se sauniga sa matua faatumuina i le mamalu o aiga faapea le ekalesia aoao. O le Toeaina Faatonu o le matagaluega a Falealili i Sasa'e, Susuga Isaia Tiatia na taitai, o le susuga o Iosua Leapai FT sa faitauina le Tusi Paia; o le tatalo o le faauuga na saunia e le Toeaina o Iosua Evile. Iosua. Na taliga e fia logo le mamalu o le sauniga i le feau tau molimoli o lea aso: O le autu o manatu: "IA FAAMAONI I LO OUTOU VALAAUINA." O se feau faaleagaga na fai ma taula ina ia manatua pea, e le gata mo i latou ua faauuina i lenei tausaga e avea ma faifeau Samoa, ae ua faamanatu foi mo le ekalesia aoao ma ona tagata lotu.

O le susuga ia Popo Su'a, Apelu Amosa, Ioritana Tanielu, Isaia Tiatia, Kerita Reupena, ma Tavita Taulealo, na faaee o latou aao ma faamanuia i ai latou i lea aso. Na molimau nisi o i latou nei na faauuina, o se laasaga taua lenei o le ola valaauina ua oo iai, ma ua lagona lava le fiafia ma le agaga faafetai i le Atua, o le na faamaite le loto onosai ma le faamalosi, ua afua ai ona aulia mai lenei aso taua mo i latou. E momoli foi le agaga faafetai ma le faamalo i aiga ma ekalesia faapea le tapuaiga mau a Tama o le ekalesia, ua faataunuuna ai lenei faamoemoe sa taupoina.

## TUUFATASIA FAIAOGA MALUA MA LONA FALETUA



O se tala fiafia mo le Kolisi nei ina ua tuufatasia le Susuga i le Faiaoga ia Visesio Saga ma lona faletua o Analeta (Angharad), e ala i le sauniga o le faaipoipoga. Na faapaiaina lenei mafutaga i le EFKS i Vaimoso ia Ianuari o lenei tausaga. O lea ua la tautua nei i vaega eseese o le kolisi e le gata i le tulaga faa-faiaoga, ao loo faaoga lo la tomai ma agavaa e fesoasoani i nisi o vaega o le kolisi e pei o le Canteen, Maluapapa, le au ta polo, Malua Literacy Programme (gagana faa-Peretania ma le gagana Samoa) ma polokalame o taaloga.

## FAAIPOIPOGA A'OA'O MALUA

E to'atolu a'oa'o o le kolisi na a'e mai i le amataga o lenei tausaga ma o latou faletua ina ua maea ona faapaiaina i le sauniga o le Faaipoipoga i le tuuaga a le Kolisi 2010-2011. Apineru Liaina, ua faaiuso nei, na faaipoipo i le EFKS Vailoa i Palauli ma na a'e mai ma lona faletua o Saili. Fotuonuuese Perelini na faaipoipo i le Ekalesia Metotisi i Magele, Aukilani ia Tesema 2010. Ma na a'e mai ma lona faletua o Selena ma ua tausaga tolu nei. I le masina o Ianuari na faafiafiaina ai le Susuga ia Fala Nila ina ua tuufatasia o ia ma Ane i le Ekalesia i Saaga i Siumu. Ua tausaga lua nei i laua i le Kolisi.

## ASIASI MAI SUI O LE CWM I LE KOLISI FAAFAIFEAU I MALUA

O le aso fitu o Mati (aso Gafua) 2011, na asiasi mai ai le failautusi aoao o le Council for World Mission (CWM), Rev. Dr. Collin Cowan ma nisi o latou sui i le Kolisi Faafaifeau i Malua. E aofia i lea malaga le tamaitai o Ms Jade Lyons (an officer of the Communication Unit of the CWM Head Office in London), o le faletua ia Taumua Toma (Mission Office EFKS), ma le susuga i le aoao o Samasoni Kupa (Counseling Centre EFKS). O lea asiasiga o se vaega o le galuega faafaifeau a le CWM, e i ai lona fesoootaiga ma nisi na aafia i le galulolo i Samoa, 2009. O se saunoaga a le alii o Cowan, na ia faamanuia ai i le Kolisi i Malua faapea le Pule ma le au faigaluega, e tusa ai o galuega o loo faatinoina i soo se ala. Na taua foi e Cowan le faamoemoe o le CWM i le lumanai ma lana galuega fesoasoani i le atu Pasefika, faapea se tala otooto i le tala faasolopito a le CWM. O le alii o Cowan sa filifilia ma faauuina e avea ma failautusi aoao o le CWM i le masina o Novema 2010, ma e tele sona sao e ala i lona tomiai, o lona poto masani faapea o ana lu'i taua sa fesoasoani tele i faafitauli o loo alia'i mai i nei ona po. O le tomiai o lenei tagata o Cowan, ua fesoasoani tele foi i le galuega a le ekalesia soo faatasi. Na mulimuli malaga mai i lea lava vaiaso le Moderator a le CWM, le susuga ia Rev Dr Prince Dibeela, ma na faia lea feiloaiga i le fale o le ekalesia (Fale o Tupulaga) i Mulinu. O se mafutaga puupuu ae na oa i manatu fefaasoa'i ma talatalanoaga ma le au faigaluega a le kolisi i Malua, ma ua avea lea ma ala e saga faamautuina ai le mafutaga vavalalata a le kolisi i Malua ma le CWM, talu mai tausaga e tele ua mavae.

Ia saga faamanuia pea le Atua i lenei fesoootaiga taua, ina ia mafai pea ona fetufaa'i manatu ma lagona taua e uiga i le alofa o le Alii o Iesu Keriso, le Ao o le ekalesia.

## MEAALOFA: WHITLEY COLLEGE, AUSTRALIA

O le faamoemoe ua taunuu, o le laau lea o le ola. O le masina o Aperila i le aso 15 ma le 19 o le tausaga nei, na faataunuina ai le tufatufaina atu o tusi aoga mo nisi o alalafaga o Aleipata na aafia i le galulolo i le 2009: Lalomanu (Pre-School); Vailoa (Primary School); Ulutogia (Primary School) ma Satitoga (Pre-School). O lenei foai na aumai mai le aoga o Whitley College i Ausetalia, e ala i se seleni tupe, ae na faatinoina ma tufatufaina e le kolisi Faafaifeau i Malua. Na tuu sao lenei foai tusi i aoga uma a nuu e pei ona taua i luga ma na talisapaia ma le loto faafetai e nei aoga uma le agalelei mai o nei aoga mai fafo. Ua maea foi ona saunia ma lafo e le susuga i le Pule o le Kolisi i Malua ma faiaoga le tusi faafetai, e fai ma sui o nei aoga uma i le Whitley College, e filisila o lenei meaalofoa taua na foai mai, mo nisi o alo ma fanau a Samoa na aafia i le galulolo.

## TAUSAGA MUAMUA 2011

| A'OA'O                | FALETUA    | A'OA'O               | FALETUA   | A'OA'O                    | FALETUA   |
|-----------------------|------------|----------------------|-----------|---------------------------|-----------|
| 1. Alaifetu Faaeteete | Kalala     | 10. Komisi Samuelu   | Mercy     | 19. Sean Palala           | Faufau    |
| 2. Amosa Silipa       |            | 11. Mautofiga Tuuu   |           | 20. Senetenari Autagavaia |           |
| 3. Clay Tofilau       | Eseta      | 12. Mofate Fuimaono  | Aliitasi  | 21. Silipa Silipa         | Tagiilima |
| 4. Epati Sooula       |            | 13. Mose Malaga      |           | 22. Tasele Tuluaauau      | Tine      |
| 5. Etiveni Taavao     | Siileviiga | 14. Orikene Mauinatu |           | 23. Tavita Evagelia       | Lei-Moana |
| 6. Faaaliga Auvele    | Lafo       | 15. Pasefika Maiava  | Talalelei | 24. Taulotoga Viliamu     |           |
| 7. Farani Puga        |            | 16. Petelo Puga      |           | 25. Ulale Sakaio          |           |
| 8. Filemoni Crawley   | Alofa      | 17. Poasa Toiaivao   | Lemina    |                           |           |
| 9. Kaisa Kaisa        |            | 18. Satala Sau       | Rina      |                           |           |

## TUSI O LE SUEGA ULUFALE 2011

1. Feagaiga Tuai - ESOTO
  2. Feagaiga Fou - FAAALIGA
  3. Gagana Peretania
- Aso o le Suega - 16, 17 Aokuso 2011

# POLOKALAME O MEATAULIMA: FALETUA MALUA 2011



Ona ua matauina le manaomia o se polokalame meataulima e a'oa'oina ai faletua mo laei o le falesa, laei faa-le-aiga, kuka eseese, ie laulau ma isi meataulima e faatamaoaigaina ai faletua o faifeau faaolioli mo le galuega ua valaauina ai, ua i ai le manatu e toe amata le polokalame lea, ina ia tali ai i le manao.

Ona faafetaia lea o le alofa ma le agalelei o le Atua ina ua mafai ona toe amataina le polokalame a faletua, sa tuua mo nai tausaga. E faia i Aso Lua 9-12 i le aoauli o vaiaso taitasi. O le polokalame meataulima lea, e auai ai faletua o a'oa'o uma o le Kolisi.

O meataulima (handicrafts) la ia sa tapena i ai mo lenei tausaga, o le su'isu'i, kolosē (crochet), flower arrangement, tusiata/ design, taina o upeti (upeti carving), cooking, batik, weaving (lalagaina o cover Tusi Paia/ ipu sene), ma le elei.

O mea ua mafai ona faataunuaina i le vaituuaga muamua lenei:

1. Na amata i le tusiga-ata ina ia saunia faletua mo isi meataulima o le a faaoga ai i le mea tau design.
2. Kolosē: sa taitaiina e le faletua faiaoga ia Taua'i Vaifale ma le faletua ia Lile Niulesa.
3. Elei printing.
4. Su'isu'i (sewing): sa matou galulue ai ma le faletua o le faiaoga

ia Lemapu Tuisuga, ma faletua o faaiuso ia Navy Motu ma Toiata Lauvi. O faletua ia e agavaa tele i le su'isu'i, sa faaso mai lo latou tomali i le au uso.

5. Taina o le upeti: Nai lo le su'e mai o upeti mai tua e fai ai le elei, ia ua matagofie lava le tagolima o le faletua ia e design, tā (carve) le upeti, elei ma su'i lona lava laei. O le agaga faafetai i le faletua ia Matagi Malieitulia

mo lana fesoasoani malosi i le meataulima lea.

Faai'ui'u le matou meataulima mo lenei vaituuaga i le faaso mai o le taleni a le faletua ia Lalokava Lima i le flower arrangement, ina ia *up-skill* ai faletua i tuiga o teu o falesa, poo nisi foi sauniga.

O meataulima uma sa mafai ona fai na fua lava tau o se 'introduction'

mea uma i le galuega a le Atua ua tofia ma valaauina ai outou.

Maua foi lenei avanoa e momoli atu ai le faafetai tele i le faletua o le Sui Pule ia Lalokava Lima, faapea faletua o faiaoga ia Taua'i, Lemapu Tuisuga, Matagi Malieitulia, Lemau Pala'amo, Sinatala Leota, Maria Samuelu, Analeta Saga, Theresa Tapaleao, Lile Niulesa, Toese Pouono, Sinuanua Nefu ma Sina Wulf i le lagolagosua i le polokalame meataulima a faletua Malua.

E le laiitiiti foi le agaga faafetai i le aiga faletua o faiaoga uma ua tasi ai se agaga e toe faaauau lea polokalame taua ona o le vaai i le Atua ma le galuega ua valaauina ai i tatou uma. O le faafetai tele mo le lagolago malosi i vaega uma ma itu uma. E le gata i le polokalame i Aso Lua ae faapena foi mo polokalame ma galuega eseese o feagai pea ma le Kolisi i taimi uma. O le faafetai

e tatou ai i le faletua o le Peresetene o le vasega o aoao, Cynthia Faletagaloa ma le faletua o le failautusi ia Vesia Faatoafe, faapea le vasega o faletua faaiuso ma le mafutaga a faletua uma i Malua i vaega eseese, mo le faamaopoopoina o polokalame uma o lenei vaituuaga, Ua matagofie, faigofie, sologa lelei ma manuia mea uma ona o le lotogatasi o outou ma tatou loto alofa i mea fai a le



i mea taulima taitasi, e tau amata-mata ai ma faamasani mo le kuata muamua. Mo isi kuata e lua mulimuli, o le a faalatele ma faaumiumi taimi e fai ai, ma galueaina ai 'projects' mo meataulima uma.

O le vaiaso mulimuli o le vaituuaga, sa asiasia ai meataulima uma, ma ua lagona lava le agaga fiafia tele, ma faafoi pea le viiga i le Atua ona ua vaaia le matagofie o galuega a faletua sa matou galulue faatasi i ai. Ma o le faafetai tele i faletua o a'oa'o, ua lagona le aoga ma le taua o le polokalame sa taumafai atu i ai, ona o le taupati mai. Faamanuia tele le Atua i lo outou ola taumafai, ma ia aoga ia

tatou Kolisi.

E le laiitiiti foi le agaga faafetai i le Pule o le Kolisi ma Faiaoga i lo latou lagolago malosi mai, ua matagofie ai a matou polokalame amata o lenei tausaga. Ao ia mea uma, ia i le Atua pea le viiga, o lona alofa ua mafai ai ona faaiuina i le manuia galuega fai a le mafutaga a faletua mo lenei vaituuaga, i lalo o lana taitaiga ma le tausiga matagofie. O le tatolo, ia faatasi mai pea o ia i a tatou galuega o totoo o le tausaga e manuia ai mea uma tatou te fai, ma ia ia te ia pea le viiga e faavauvau.

Faafetai,  
Samata Uili.

# A OGA FAATAITAI A MALUA

O le pese '92', 'Faafetai i le Atua', e lagiina lava e le fanau aoga i taeao uma e amata ai le aoga i lea aso ma lea aso. Ona sosoo ai lea ma le tatalo e saunia lava e tamaiti aoga. O le agaga fiafia ma le fagaetia, ona ua oo mai i le faaiuga o lenei kuata ua iloa e fanau laiti ona fai le tatalo. Ua fiafia ai lava i latou e faatino lea vaega o le ola aoaoina i le Maluapapa Pre-School.

Na toe amataina le aoga ia Fepuari 28, 2011, talu mai le tuuaga ia Tesema 2010. E toa 20 alo ma fanau [12 tama + 8 teine] na mafai ona resitalaina e amata ai, ma le to'a 2 o le tama ma le teine, na toe faaopoopo i totonu o le fa vaiaso talu ona amata le aoga ona maua ai lea o le aofaiga atoa o alo ma fanau a'oa'oina e to'a 22 [13 tama + 9 teine]. O le aoga e amata i le 9.00 i le taeao, ae tuua i le 12.30 i le aoauli mai le aso Gafua seia oo i le aso Faraile. O le matua faatapulaina o tamaiti e mafai ona resitalaina o le va o le 2 ½ tausaga ae lalo ifo o le 5 tausaga le matua. O le 5 tausaga o le tamaitiiti ua tataua loa ona ulufale atu i le aoga tulagalua.

O le aofai o faletua na fesoasoani i lenei kuata e to'a 12. O Aliitasi Fui-maono, Eseta Tofilau, Fau Fau Palala, Ane Nila, Vaialisi Seti, Logola Mo'a, Magalelei Maiava, Selenia Perelini, Anne Tufuga, Lipale Tanoi, Makerita Mataafa ma Maria Logovii.

Sa vaevaeina i latou nei i vaega [groups] e 3. O le 4 tausaga, 3 tausaga ma le 2 ½ tausaga. O tamaiti e tai 4 tausaga, e aofia ai Gloria, Charles, Norman, Risale, Sovala na feagai lea ma Aliitasi, Selenia, Makerita, Maria. O tamaiti e tai 3 tausaga e aofia ai Siona -Fou, Tuualagi, Mene, Xtian, Faafetai, Faailoa, Adrianne, Samuelu sa gafa lea ma Fau Fau, Vaialisi, Logola, Anne. O tamaiti e tai 2 ½ tausaga e aofia ai Kilifi, Spike, Viliamu, Aitaua, Alana, MJ, Fale, Tumanu, Matulino, sa feagai lea ma Eseta, Ane, Magalelei, Lipale.

O le 7.00 i taeao o Aso Toonai taitasi e faatino ai aoga a faiaoga faataitai, i lalo o le taitaiga a Samata Uili, lagolagosua i ai faletua o faiaoga ia Lemapu Tuisuga, Sinatala Leota ma Toese Pouono, ina ia lava tapena faiaoga i Fuafuaga o le Lesona [Lesson Plan], ina ia i ai le Sini ma lona



Malua Pre-School 2011

Faanaunauga ia ausia [Goals & Objectives], Auala e faatino ai [Strategies], Alagā'oa [Resources] ma lona lloiloga [Evaluation]. O le faamamafa ma le faatau, ia ausia le sini ma faanaunauga o mataupu a'oa'oina, e ala i le faaagaina o alagā'oa e fausia ai metotia eseese, ina ia faigofie ona malamalama ai le tamaiti 2 ½ tausaga agai luga. O le faamoemoe, ia a'oa'oina le fanau ia mafai ona faasoa [share], atina'e le mafau Fau e faatino ma fesoatai uiga eseese o mea taitasi, aemaise le atina'e o le gagana tautala ma le gagana tusitusi. O Galuega sa faatinoina i lenei kuata. e aofia ai mataupu nei; O Meaai Paleni, O Laau Tetele, O Laau Laiti, O Laau Sosolo, O Meaola o le Sami & Vai, O Manu Vaefa, ae faaiu i le Eseta. Sa faapea ona saunia e faiaoga pese & tauloto, faatatau lava i ia mataupu taitasi, e saga faamanatu ai pea mataupu ma galuega sa faatinoina i lea aso ma lea aso.

Ua faatauaina foi i le Maluapapa Preschool le Soifua Maloloina o Fanau, e ala lea i le taumafa i Meaai Paleni. O le taimi o le Morning Tea, o le taimi lea o le latou fruits [apu, moli, esi, faipula ma le fala pula pe'a maua], faatasi ai ma faamalositino e faia pe'a o'o i le taimi o Taaloga [Outdoor Activities].

E avea ai foi lenei avanoa e momoli

atu ai le faafetai tele i le Pule o le Kolisi, lau Susuga Afereti Uili, le aiga faiaoga ma faletua, faapea foi le mafutaga a a'oa'o ma faletua, i lo outou lagolago malosi i soo se taumafaiga, aua le lumanai manuia o le Maluapapa Preschool. E faafetai faapitoa i le Faletua o le Alii Pule, Samata Uili faapea faletua o faiaoga Lemapu, Sinatala ma Toese i lo outou tomali ma le silafia ua faasoa mai e taosoina ai o matou tagata faatau, aua le aoaoina o alo ma fanau mo le lumanai. E fia faaleoina foi le agaga faafetai i Samaria-agalelei [Alex Pala'amo & Peta Pouono] i le fesoasoani mai e ala i Easter Eggs sa mafai ai ona faatino la matou polokalame o le Eseta. Faafetai foi mo polokalame faagasolo o lenei kuata muamua ua faaiuina ma le manuia. E le faagaloina le agaga faafetai tele i faletua uma sa matou galulue, aua le a'oa'oina ma le faafoeina o le Aoga Amata i lenei Kuata. Malo le galulue. Malo le onosai. Faafetai alofa i alo ma fanau. Ia alofa mai le Atua i la tatou folauga i le aga atu i le faaiuga o lenei tausaga.

God Bless!

Maria Setefano Logovii [Taitai].

# AUTALAVOU LAITI

O tausaga uma lava i totonu o Malua, e faamanatu ai lava e le autalavou laiti e Aso Malu ma le Toe Tu mai o lo tatou Alii Faaola e ala i tala e faatino, o pesepesega ma faaevagelia. O le kuata mua-mua faaleaoaoga a le kolisi i le masina o Aperila e masani ai ona faatino lea faamoemoe a le fanau. E fesuisui taga ma faatinoga ae tasi lava le auga o lea faamoemoe o le faatauaina lea o tiga o lo tatou Alii Fa'aola o Iesu ae taualuga i lona toe tu manumalo mai le oti ma le tuugamau ua atoatoa ai le faaolataga mo tagata faatuatua uma lava.

I lenei foi la tausaga ua matauina lava le faatupulaia o le faitau aofai o le autalavou. Sa o latou faatinoina ai se tala e fausia mai i le molimau a le Tusi o Luka i le maluu ma le Toe Tu o Iesu. O lea tala sa faaoga ai metotia faaneionapo, e le gata le tautala a o faatinoga e ala i pese (contemporary). Sa avea foi lea avanoa e faaali ai nisi o taleni a le fanau e pei o le ta piano, o le pese ma le lelei i faatinoga (acting). Ua faaoga foi musika mai ata tifaga e lautua ai le tala e pei lava o se ata tifaga. O ia faiga ma le faaagaina o



metotia eseese ua faia ina ia fou pea lea tala i manatu ma lagona o tagata ui o se tala ua laulauvivilu ai tagata uma.

O nisi o mea na tutupu i lenei kuata muamua: o le masina o Mati na tuua ai le mafutaga e le gata i le kolisi ao le autalavou ona o le valaau paia a le Atua i se tasi o aoao sa nafa ma le taitaiga o le autalavou, le susuga ia Tubusareia Tiatia. E manatua pea lea uso ma misia o ia ona o ona uiga tausafia, o le sogasoga ma le faamaopopo i polokalame fai a le autalavou. Sa fai foi o ia ma se tasi o "role model" e tepa taulai i ai alo ma fanau ona o ona uiga faaaloalo ma le amio pulea.

O le masina o Aperila na faamavae atu ai le autalavou i le latou uo o Jedi Sua ua tuua nei Samoa mo atunuu i fafo ona o le faalateleina o le poto ma le malamalama. O se alo e faasino i le susuga i le faiaoga ia Muao ma le faletua ia Tauvela Sua. Ua faamanuiaina o ia e ala ise sikolapi a le malo o Samoa e aoga ai i se tasi o lunivesete i Ausetalia. Ia faamanuia tele le Atua i le taumafaiga a nai a tatou fanau aua se lumanai manuia o aiga, nuu ma ekalesia faapea le malo o Samoa.

O le autalavou a Malua o loo i lalo o le taitaiga a susuga i faiaoga o Aigofie Marino, Alesana Pala'amo ma le faletua ia Lemau, Leitualasa ma le faletua ia Matagi Malieitulu faapea le susuga i le faletua ia Lemapu Tuisugaletaua. Ua tofia foi aoao ma faletua o le tausaga lua i lenei tausaga ma ua vaevaeina i vaega e tolu e lagolagosua i faiaoga.

Manuia tele taulumaga o lenei tausaga, faamanuia foi le Atua i faiaoga, o aoao ma faletua aemaise le autalavou, o le lumanai o le Ekalesia.

Soifua ma ia Manuia.

# VAEGA O LE PA POVI

O le atinae o manu papalagi ua tele lona aoga mo le Kolisi i Malua. O lenei atinae e faalagolago lava lona lelei ia i latou o loo vaaia pea manu papalagi i aso uma. I le amata mai o lenei tausaga seia oo mai i le vaiso mulimuli o lenei vaituuaga, o loo lelei mea uma e tusa ai ma galuega faagasolo a le pa povi. Ua maea ona veleina le mautofu ma le vao pinati e ala i le lagolago mai a le kolisi. Ua uma foi ona faaleleia itu uma o le uaea i le faataamilosaga i fafo aemaise i totonu o le pa.

I se ripoti i aofaiga o manu papalagi, e amata galuega o le 2011, e 17 manu papalagi. E 5 ni manu sa faaagaina i fuafuaga a le kolisi ma o lo'o ua totoe ai nei manu e 12. (2 pulu, 6 aumatua, 2 ta'anoa, 2 povi po'a ua



uma ona fofo).

E viia pea le Atua ona o lona agalelei ua manuia ai faiva o lenei vaituuaga. E momoli atu le faafetai tele i lau susga Afereti Uili ona o fautuaga ma timaiga ua lelei faafoe ai galuega faatino, aemeise lua susuga i faiaoga

Samasoni A. Moleli ma Malutafa Leaupepe ona o le taitaiina o galuega faa-pa povi i lenei vaituuaga. Faafetai i susuga i a'oa'o, (Yr 3) Siatafu T, Luteru O, (Yr 2) Enoka A, Seti S, Faafetai I, (Yr 1) Tasele, ona o lo outou galulue ma le punoua'i aua le lelei soloiluma o le pa povi. Faafetai foi i lau susuga Taipisia L ma Tanoalei'a T ona o lo oulua lagolago atu i le tele o taimi pe a moomia ai le fesoasoani. O le tatalo i le Atua, ina ia fa'aauau lea matagofie o galuega a le pa povi seia uma lenei tausaga. Manuia le tuuaga a le kolisi, Ma le faaaloalo lava

Faafetai.  
Tanuri Pesaleli ma Kamuta Mataafa

# MALUA LITERACY PROGRAM & CHILDREN'S LIBRARY

O polokalame nei e lua, e ese mai le Pre-School o loo fesoasoani i ai nisi o faletua o faiaoga ma faletua o a'oa'o: o le Faitau Tusi a le fanau i le gagana faa-Peretania (English Literacy Reading), ma le Faletusi mo tamaiti (Children's Library). O lo'o i ai foi ma le polokalame faitau tusi i le gagana Samoa, e faapitoa i le faitauina o le Tusi Paia, o loo ta'ita'ia e le faletua ia Lile Niulesa faatasi ai ma nisi o faletua o Faiaoga.

E i ai le talitonuga, o a tatou fanau o lo tatou lumanai lea. O tatou foi e faia avanoa e tapena ai olaga o nai a tatou fanau mo se lumanai manuia i lalo o le taitaiga sili a lo tatou Atua.

Ua matou malamalama i le taua o le faitau tusi i ulua'i vaega (early stages) o le olaga o le tamaitiiti. A tele le taimi e faaalu i le faitau tusi, o le vave foi lea ona lelei ma agai i luma le faitau a le tamaitiiti, aemaise o le faaogaina o lona mafaufau e a'oa'oina ai mataupu eseese o le olaga i lona tuputupu a'e.

O Aso Lua ma Aso To'onai i le itula e 7 i le afiafi e faatino ai le polokalame faitautusi. Ua faapitoa le polokalame lea mo le fanau faatoa amata i le Primary School (5 tausaga i le 10-12 tausaga). E silia ma le 60 tamaiti e auai i lea polokalame.

O le faagaioiga ia o le polokalame, e faaoga ai faletua o a'oa'o e to'aono e fesoasoani mo vaiaso e tolu ona fesuia'i lea. O le faamoemoe, ia maua uma e faletua le avanoa e faamasani ai i lea polokalame taua, aua le latou galuega i se taimi o i luma.

E faapea le faagaioiga: ua faaoga lanu eseese (colours), e fua i ai vaega o le faitau a le tamaitiiti. Ona faitau lea o le tamaitiiti i lana lanu talafeagai. Se'i iloga ua lelei ma ua tatou ona sii i leisi lanu, (tusa lea ma le 20-30 tusi ua uma ona ia faitaua), ona su'esu'e lea e fua ai le lanu i luga e sii i ai. E tusa ma le 12 vaega o lanu e tufa i ai le fanau. Amata mai i le lanu paepae (white) mo le vaega faatoa amata le faitau e faagata i le 'Ruby' (mūmū pāuli) mo i latou ua matua lelei le faitau.



E ono vaega (groups) e faaigoaina i igoa o i'a o le sami - Turtles, Sharks, Whales, Stingrays, Dolphins and Penguins. O vaega ia ua vaevae i ai le fanau ina ia galulue ai faletua ma tamaiti i le faitau tusi, ae rotate i po eseese o le polokalame, ina ia faamasani uma le fanau ma faletua poo tina o i le Kolisi. Ma e lu'i ai le fanau e toaga e faitau ma ia tele ni tusi ua ia faitaua, e sii ai i luga i le isi tulaga. E maua foi le avanoa e ave ai e le tamaitiiti se tusi i le fale e faitau i matua, ma faaauau i le aiga le tomali lea, ma toe faafoi le tusi e sui i aso taitasi o le 'literacy reading.' O le faamalosi foi lea mo matua ina ia fesoasoani tele lea mo se lumanai manuia o le la tama.

E i ai foi le Library o loo ou vaaia, faapitoa mo le fanau. E fai i Aso Toonai i le itula 5-6pm. E faataga ai le ave i tua o tusi a le fanau e faitau i le fale. O le Library lea o loo setup i tafatafa o le Maluapapa Preschool, ma o loo tatala le avanoa mo le fanau uma a Malua, faatasi ai ma le autalavou a Malua e sutesue i ai. A i'u loa le tamaitiiti mai le Literacy Reading ua i ai foi le avanoa e tele ai ni ana tusi e mafai ona ave i tua mai le Library. O le isi lea avanoa e faaauau ai pea le loto fia faitau tusi o le tamaitiiti, ina ua uma mai le Literacy Reading. E feololo lava ni tusi o i le matou Maluapapa Children's Library, ae talia lava ma le agaga faafetai ni agelu Samaria o loo fia ofoina mai ni tusi e fesoasoani i le sui foi o le vaai ma le

faitau a le fanau, ma ia olaola ai pea le Library a le fanau i le tatou Kolisi nei.

Mo a'u, e ese foi le manaia o le auai i polokalame ia ona e le gata i le lu'i, a'o le fiafia e iloa i foliga vaaia, le sogasoga ma le tele o le taumafai a le tamaitiiti i le una'iina i luma o lana faitau. E matauina ma le faafetai le aoga o lea polokalame ona o le fiafia tele ma le toaga atu o nai fanau i le reading. O le tatalo, ina ia iloa uma e matua le taua o le faitau tusi, i le tele o le aoga mo le fanau ma ia latou toaga e faaauau pea i taimi uma, aua le lumanai o a tatou meaaloa taua.

O le avanoa lelei foi lea e momoli atu ai le faafetai tele i le faletua ia Rita Eteuati, tusa ai ma le lava o le onosai, ma le alofa tele i le tau ave mai o le polokalame mai le la tausaga 2010, ma o loo lagolago malosi mai pea, faatasi ai ma isi faletua o faiaoga, Toese Pouono, Vaiola Maiava ma Analeta Saga. Ua matagofie lava le galulue faatasi o le au uso ua faigofie ai le galuega, e le gata mo le fanau ae maise mo le Alii, tusa ai ma le valaauina i totonu o le Kolisi nei. Ae ana leai le fesoasoani tele a faletua o a'oa'o o loo auaua'i mai, e le manuia le matou galuega mo le fanau.

Faafetai tele e tatau ai i le Pule o le Kolisi, Faiaoga ma faletua, a'oa'o ma faletua i le lagolago malosi i le polokalame taua lea, i le tapena lelei o latou i po taitasi, aemaise le galuega tele o loo fai i aiga o le faaavanoa o le taimi e faalogologo ai i le faitau a le fanau. O le faafetai foi i le fanau, ona o le toaga mai pea. O le tala mo outou, *Keep it up, it's for your own benefit...God Bless you all.*

O ia mea lelei uma, o le manuia ua tatou maua, e le manuia fua se mea pe ana le i ai le auai mai o le tatou Alii, ma ia ia te ia pea le viiga e faavaauva faavaauva lava. O le tatalo ina ia auai mai pea le Alii, ia sologa lelei pea le polokalame faitau tusi a le fanau i le lumanai.

Faafetai,  
Samata Uili

## RIPOTI AOGA FAITAU TUSI SAMOA

E muamua ona faatalofa atu i le suafa mamalu o lo tatou Alii o Iesu Keriso. Ao sina ripoti lenei o le Aoga Faitau Tusi Samoa a alo ma fanau a Faiaoga faapea fanau a Aoa ma Faletua. O afiafi o Aso Faraile uma e fai ai le Aoga Faitau Tusi. O le Tusi Paia Samoa ma tusi ua tusia i le gagana Samoa i lalo o le ta'ita'iga a Faletua o Faiaoga: Faletua o le Sui Pule, Lalokava Lima, Taua'i Vaifale, Sinatala Leota,

Theresa Tapaleao, Vaiola Maiava, Toese Pouono ma Analeta Saga.

O tamaiti ua ta'i 5 tausaga seia o'o i le ta'i 10 tausaga le matutua. Moomooga ina ia iloa e tamaiti ona faitau ma malamalama i le gagana Samoa.

Faafetai  
Lile Niulesa

# AOGA ASO SA

“Lo’u agaga e, ia e faamanu atu i le Alii, o mea uma foi o i totonu ia te a’u, ia faamanu i lona suafa Paia. Lo’u agaga e, ia e faamanu atu ile Alii, aua foi nei galo se mea e tasi o ana meaalofo” (Salamo 103).

Ia i le Atua poto lona lava viiga e faavavau, aua o lona alofa tunoa ua ia taitaiina mai ai lo outou soifua galulue ma so matou ola vaivai, tatou te aulia manuia mai ai lenei foi vaitau taua o le tausaga. Malo soifua maua, malo le lagi e mama. E momoli atu le faamalo ma le faafetai i la outou tatalo, aua o la outou pati taoto ma faanono manu i le Atua, i le tatalo faia pea i soo se taimi, o loo solo lelei ma manuia ai pea faiva ma tiute o Malua nei, aemaise ai, o le tapuaiga mau i le Susuga i le Alii Pule ma le faletua, Dr. Afereti ma Samata Uili, le Sui Pule ma le faletua, le aiga Faiaoga ma o latou faletua, ma le Laumua o Malua i le nofo a suega.

O le tausaga nei 2011, o se tausaga ua faamauiina foi ma avea o se vaitau o ni suiga mo le Aoga Aso Sa a Malua, e le gata ua feiloai atu ai foi i nai aoao ma faletua o le tausaga muamua, ae fiafia tele le agaga, ona ua mafuta atu ai foi i nai a latou fanau. O se fiafiaga sili foi, ina ua maua avanoa lelei ua saunia e le Atua, e mafuta ai i le Alii Pule ma le faletua i o laua faiva alofilima amata o lenei tausaga.

E pei lava foi ona silafia e le toatele o le aufaigaluega galulue, e tele tausaga ua mavae atu, sa

amatalia ai le Aoga Aso Sa i le taimi o le pese e lua (2) o le lotu taeao, ona ulufafo lea o le fanau ma faiaoga o le Aoga Aso Sa, mo le amataina o la latou polokalame i le Fale Mafutaga, peitai o le tausaga nei 2011, sa tuuina atu ai se talosaga a le aiga faiaoga Aso Sa i le Alii Pule, mo se suiga. O le mafuaaga taua lava ina ia mafai ai ona auai uma le fanau, ma Faiaoga Aso Sa i le tapuaiga atoa i Aso Sa taitasi.

Ua amataina nei le Aoga Aso Sa i le afa o le fitu i le afa o le valu i taeao o Aso Sa uma (7:30 am - 8:30 am), ona agai sao ai loa lea mo lotu taeao. O taimi ua faia ai aoga e saunia ai mataupu mo fanau, ua le’o toe faia i taeao o Aso Sa, a ua suia i le ta o le fa i afiafi o aso Toonai taitasi, o le faamoemoe taua ina ia maua ai nisi avanoa lelei, e toe faalelei ai nisi mea o moomia le toe fia faaleleia. O taaloga foi mo fanau, ua faaagaina le taeao o aso Toonai e malu mo nai fanau, ona ua vevela tele le la i aoauli e pei ona masani ai.

E to’a luasefulu lua (22) faiaoga Aso Sa sa tofia, o aoao faaiuso ma nisi o faletua o faaiuso, ma faletua o faiaoga sa ofoina mai lo latou taimi taua e aoao, fesoasoani, fautua ma apoapoai i le galuega.

(Faletua o Faiaoga) Lalokava Lima, Sinatala Leota, Tauai Vaifale, Lemapu Tuisuga, Lile Niulesa, Theresa Tapaleao, Amelia Setefano, ma Maria Samuelu.

(Aoao Faaiuso) Apineru Liaina, Lole

Fiso, Tavita Faletagaloa, Kamuta Mataafa, Tanuri Pesaleli, Aperaamo Tufuga, Tanielu Lava, ma Feterika Motu.

(Faletua Faaiuso) Maria Setefano, Sina Lafolafoga, Etevisi Pati, Fuarosa Maulolo, Paono Tofilau, Vesia Faatoafe.

E fai ai le tautalaga faatauva, e momoli atu ai mai le taele o le lotu ma le agaga, le faafetai, faafetai tele, i le galuega fita sa outou feagai ai i lenei kuata, ia alofagia e le Atua ina ia faamanuia ma liligi atu ona tamaoaiga i le tino, ae sili i le agaga, ona o lo outou soifua tautua ma le ola auauna i le Atua, e ala i le faailoa atu ma aoaoina fanau i Afioga Paia a le Atua, ma auala Faa le Atua, e ao ona tutupu ma ola ai nai fanau. Ia faamanuia tele le Atua i tofi ma outou faiva o feagai ai, e faapena i lo outou soifua a’otauina.

O a foi ni faaletonu o le auauna faatauva i le taitaiina o la tatou mafutaga faa-faiaoga Aso Sa i lenei Kuata, ia alofagia e le Atua ma faamagalo mai le auauna vaivai. Ia soifua manuia le Susuga i le Alii Pule ma le faletua, le Sui Pule ma le faletua, Le paia i le aiga faiaoga ma outou faletua, aemaise o le Laumua pele i le Agaga, o Malua.

Faafetai,  
Feterika Motu  
(FAILAUTUSI)

## TAALOGA A FALETUA

O se oototoga lenei mai le polokalame ta’alo a le Mafutaga a Faletua o le kolisi mo le kuata muamua, 2011. Ona o le autu (theme) o lenei tausaga mo polokalame faatino a le Mafutaga a Faletua o le “IA FAAALI LOU ALOFA” ua taumafai ai le Komiti o Taaloga e faia ni polokalame e ese mai polokalame masani auā lava le faatauaina o le soifua maloloina lelei o le mafutaga a Faletua.

O le polokalame ua maea fuafuaina mo lenei tausaga atoa o le

taaloga volipolo e tauvā aga’i i ai ‘au e fa (Naomi, Ruta, Tepora ma Hana), ua maea ona vaevaeina i ai faletua o faiaoga ma aoao, faapea ma polokalame fou ua faaofiina mo le kuata lona lua e i ai le soccer, rugby touch, softball, netball, cricket ma mini games (tufigā popo, miligā taga, tuugā’ai ma le tosogā maea). E lua taaloga e faatino e to’vā ai le taaloga volipolo i le kuata. O lenei la kuata muamua sa tausinio ai ‘au e fa i le soccer ma le rugby touch.

O Aso Tofi lava o loo faatino ai

lenei polokalame, ma e faia lava jazzercise e warm up ai faletua ae le’i agai atu i le malae. O se tasi foi o polokalame ua matou ta’ua o le BIGGEST LOSER o se vaega o le fitness program e faatino i Aso Lulu lona lua i masina taitasi, e aofia ai le ZUMBA, o marathons walks faataamilo i le malae ma jazzercise. E fuaina ai foi ma pauna o faletua ma faamauiina poo ai e tele pauna pa’ū i le tausaga atoa, e i ai le faamoemoe e toe fuaina i le aso taalo mulimuli o lenei tausaga.

*fa’auau itulau 15*

mai le itulau 14

O le Komiti na tofiaina mo lenei polokalame e aofia ai le Faletua o le Pule ia Samata Uili, faletua o faiaoga ia Amelia Matagi Malieitulu ma Amelia Setefano faatasi ai ma le lagolagosua a faletua o aoao faaiuso ia Paono Tofilau, Rosa Maulolo, Maria Logovii, Lipale Tanoi, Sina Lafolafoga ma Litia Polutea.

IA FAAALI LOU ALOFA o se faatofalaiga ua faa-autu uma i ai fuafuaga a lenei komiti, ua le gata i le fesoasoani i le maloloina lelei ai o le tino ae ua matou faatauaina foi le maloloina lelei ai o le mafaufau, loto ma le agaga,



pe a maua uma e faletua le fiafia ma se healthy lifestyle i totonu o lenei aai, auā le ola a'otauina ma le ola auauna mo Keriso ma lana Talalelei. Tau ina matou faapea atu ia avea le agaga alofa faa-tina o Naomi, tautua faamaoni o Ruta, taitai amiotonu o Tepora ma le agaga tatalo o Hana e laei ai lo outou alofa pe a tuua lenei aai o Malua. Ia faamanuia le Atua ia te outou ae ola lenei komiti vaivai i lona alofa.

Ma lou faaalalo tele lava  
Litia Polutea

## TAALOGA A AOAO

O Taaloga o se tasi lenei o polokalame taua o le kalena faaletausaga i totonu o le kolisi. O le faamoemoe maualuga lava ia maua e a'oa'o le soifua maloloina ma le fiafia, ao feagai ai ma le soifua aotauina i totonu o le aai. O lona uiga, ia maloloina le tino, mafaufau, ma le agaga, ina ia mautinoa le sologa lelei ma le manuia o le faatinoga i tafa uma o le soifua ofoina atu mo le Atua. Ua mafai ona faataunuaina lenei faamoemoe, ona o le lagolago malosi mai a le vasega o Faiaoga. E le gata i lea, ao le faamalo'ulo'u mai foi o le pa'aga masani a le Kolisi i ana taaloga, le Susuga i le Faafeagaiga, Tunupopo Patu.

O Taaloga e faataunuaina i Aso Tofi taitasi, e amata mai le itula e 1:00 i le aoauli ae faamaeaina i le 5:30 i le afiafi. Ua vaevaeina foi a'oa'o i au e lua; o le White ma le Black, mo taaloga o le Touch Rugby (*Lakapi Pa'i*) ma le Soccer, se'i vagona ai le Taaloga Kirikiti ua vaevaeina ai a'oa'o i au e fa; Lanu Meamata (*Green Life*), Lanu Moana (*Blue Sky*), Lanu Mumu (*Red Glory*), ma le Lanu Samasama (*Yellow Flame*).

O Taaloga o lo'o faafoeina e a'oa'o o le Tausaga Fa po'o le komiti faafoe foi lea o taaloga, i lalo o le taitaiga ma le lagolago mai a faiaoga. O le taitai komiti o le susuga ia Muao Su'a ae lagolagosua Terry Pouono. O a'oa'o o le komiti o taaloga o Kamuta Mata'afa, Patrick Ah Poe, Tanuri Pesaleli, ma Reupena Maulolo.

I le Kuata muamua, e ono vaiaso na faia ai taaloga o le lakapi pa'i ma le soka, ae lua vaiaso na faatinoina ai taaloga kirikiti. O iuga la nei o taaloga ua mafai ona tuu faatasia e le

komiti mo lenei vaitu'uaga.

|          | BLACK    | WHITE    |
|----------|----------|----------|
| Vaiaso 1 | Manumalo | Faiaina  |
| Vaiaso 2 | Faiaina  | Manumalo |
| Vaiaso 3 | Tutusa   | Tutusa   |
| Vaiaso 4 | Faiaina  | Manumalo |
| Vaiaso 5 | Faiaina  | Manumalo |
| Vaiaso 6 | Faiaina  | Manumalo |

O le aotelega o le taamilosaga lenei; o le BLACK e 1 Manumalo, 1 Tutusa, 4 Faiaina, ao le WHITE e 4 Manumalo, 1 Tutusa, 1 Faiaina.

### KIRIKITI

*Taamilosaga Muamua:* Lanu Moana vs. Lanu Meamata (Manumalo Lanu Meamata)

*Taaloga o le Talita:* Lanu Samasama (Talita 2010) vs. Lanu Mumu (Manumalo Lanu Mumu).

*Taamilosaga Lua:* Taaloga Talita: Lanu Mumu vs. Lanu Moana (Manumalo Lanu Moana). O loo ua mau nei le Talita i le Lanu Moana mo lenei kuata.

O le viiga ma le faafetai i le Atua, ona ua mafai ai ona faataunuaina lenei faamoemoe taua aua le nofo fealofani, aemaise ai o le soifua maloloina o susuga i Faiaoga ma le mafutaga a a'oa'o. E manatu le komiti faafoe, E LE O LE MANUMALO, A'O LE SOIFUA MALOLOINA LELEI MA LE MAFUTA FEALOFANI o le mea sili lea.

Soifua: *Reupena Maulolo*.

## KALENA mo MALUA KUATA II & III

**May** 27 TERM Two Begins  
Students return 4pm

30 Lectures Begin

**June** 13-17 Reading Week

20-24 Semester 1 Exams

27-01 July Iron Week

### SEMESTER 2

**July** 04 Semester 2 Lectures Begin

**August** 12 END of Term 2

16-17 Entrance Exams

30- 04 Sept  
**PCC 50th Anniversary**

**Sept** 12 Term 3 Begins

30 Submission of Theses

**Oct** 09 White Sunday

10 Entrance Exams Results  
12noon

10-17 White Sunday Holidays

**Nov** 07-11 Reading Week

14-18 Semester 2 Exams

**26 Graduation**

**“A FAI E MALOLO, E MALOLO LAVA A LE TAMALII” :**

**F A A M A T U U   A T U   I P U   O   S I A M U P I N I   M O   L E N E I  
T A U S A G A   I   T A G A P O L O - F A A - V A - M A L O**

O upu o loo tomua ai le ulutala i luga, o se lagona lea na atagia i saunoaga a le taitai o le au mai Malua, Susuga Afereti Uili ina ua malolo lana au e le gata i le taaloga ma le au malosi mai Ausetalia, ao le taaloga foi i le va ma le au mai Niu Sila. O upu faalaeiau o loo atagia ai, e le gata o le agaga tausinio sa faatino ai le taaloga, ae le'i faigofie foi ia Malua ona faamatuu atu le siamupini o lenei tausaga. Peitai e ui i se naunau i le manumalo, ao le faiva lava foi o le tamalii o le faaaloalo. Ae e le o tuumamaina iinei le agaga tausinio ma le saunia lelei o nei au uma e lua, ma ua tauia lava lo latou tautiga.

O se lagona na laualuga lava i nei faamoemoe, ma o se agaga foi lea na faavae ai nei mafutaga taalo, ina ia mafai ona mafuta ma fetufaai ma faatumaui le fealofani i le aufaigaluega, ao se avanoa lelei foi e faatupu malosi ai ao alo atu le Ekalesia i ana fonotaga. Talosia i le alofa o le Atua, e faaauau pea nei faamoemoe lelei.

**Ausetalia vs Malua – Aso Tofi, 5 Me, 2011.**

O lenei faamoemoe na faataunuuna e pei ona atofaina, i le

O le itula e 2.00pm, na maea ai taaloga uma, ona faamaopoopoina ai lea o scores, ao alo le paia ma le mamalu o au uma e lua e tali le sua. Na maea lea ona alo atu i le laugatogi. Talu ai ona e valu (8) au a Ausetalia ae iva (9) au mai Malua, o lea na manatu ai le komiti e faaagaina scores pito i lelei e fitu (7). I le tuufatasiaga la o nei togi na tulai mai ai, ua manumalo le au malosi mai Ausetalia i le faaagatama o lenei tausaga. Ua see atu nei la le Ipu faava-o -malo i Ausetalia seia toe aulia le tausaga e 2012.

**Taaloga - Fefiloi - Aso Faraile, 6 Me, 2011.**

Sa faataunuuna lenei taaloga i le malae i Tuanaimato ona o se tofa na ae i le komiti i le tausaga ua mavae, ina ia faamautuina atili le mafana o mafutaga i au e lua. E fefiloi au e tausinio mo le Ipu ua taua o le *Toailoa-Perelini Cup*. O lenei ipu, o loo faatauina ai le sao o nisi o Tamā sa taulamua i lenei faamoemoe i lona amata mai.

I le tausaga na tea nei, e toatolu au sa manumalo tutusa i lenei Ipu.

Peitai ina ua maea le tauvaga o lenei tausaga, ua manumalo aoao ai le au a le Toeaina o Aviti Etuale ma Su'a. Faamalo tauivi. Viia le Atua ona o lenei faamoemoe taua.

**Niu Sila i Saute vs Malua –Aso Lulu, 11 Me, 2011.**

O lenei faagatama faava-o malo ua tele tausaga o faaauau. Ma ua tele foi tausaga o umia pea e le au mai Malua le siamupini. O le ala foi lea o le le alo tamala o le masii mai o le au mai Niu Sila. Na faapea foi se agaga finau na faaalila e le au mai le Laumua. Peitai e ui i se naunau atu ae ua fai lava si malosi o le au mai Niu Sila. Ina ua maea le tuufaatasiga o ai o au taitasi, ua tulai mai le manumalo aoao o lenei tausaga le au mai Niu Sila i Saute. Ua see atu nei le ipu, i Niu Sila mo lenei tausaga seia aulia foi lona tausaga fou.

Na maea le laugatogi ona saunoa

faalaeiau lea o le Toeaina faatonu o Popo Su'a e faafetaia le aso ma lona faamoemoe ma le naunautaiga ina ia tumau pea le agaga mafuta ma le fealofani o le aufaigaluega. O lea foi le agaga o le saunoaga a le Alii Pule ia Afereti Uili, ina ua fusia faatasi le au uso uma i le agaga o Keriso. Saunoa Afereti, e ui ina malolo le au a le Laumua, ao se avanoa lelei foi e




**Tuuina atu le Ipu i le Susuga Toeaina Popo Sua**

faatafao ai le Ipu mo lenei tausaga e tasi, ona toe foi mai lava lea i lona nofoaga tumau, i le Laumua.

Sa faaiiina lenei faamoemoe i le tatalo, ona lulu lima lea ma faatofa.

Faafetaia le Atua i lona alofa ma lona agalelei ua faataunuuna ai nei faamoemoe lelei. Manuia le FONO TELE.

Soifua



**O le au tapolo a Ausetalia**

malae tapolo i Fagalii. Na amataina i se tatalo puupuu na saunia e le Susuga i le Toeaina, Simeona Taefu, ona alo ai lea i le malu taeao na saunia e le au mai Malua, ona faagasolo ai lea o le faaagatama. Matagofie foliga uma o lenei aso. E le gata i le lagilelei o le aso, ae leai foi se mea na faalavelavea ai le polokalame.

The Malua Golf Team uniforms  
generously donated by

**Digicel**  
samoa

*Kind Contributions to this tournament  
also from BlueSky Samoatel*

**Komiti o le Maluapapa**

Peniamina Leota, Alesana Eteuati, Terry Pouono, Saipale Maiava, Visessio Saga, Aigofie Marino, Imoa Setefano, Malutafa Leaupepe, Samasoni Moleli, Leitualasa Malieitulu, Alesana Pala'amo  
Malua Theological College  
www.malua.edu.ws